

Na osnovu člana 16. stav 1. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona" broj 7/10) i člana 12. Zakona o dopunskim pravima branilaca i članova njihovih porodica ("Službene novine Zeničko-dobojskog kantona" broj 1/14), na prijedlog Ministarstva za boračka pitanja, Vlada Zeničko-dobojskog kantona, na 172. sjednici održanoj dana 10.07.2014. godine, d o n o s i

U R E D B U

O MEDICINSKOJ REHABILITACIJI BRANILACA I ČLANOVA NJIHOVIH PORODICA U BANJSKO-KLIMATSKIM LJEČILIŠTIMA

DIO PRVI - OPĆE ODREDBE

Član 1.

(Predmet Uredbe)

- (1) Ovom Uredbom utvrđuju se uvjeti, način i postupak ostvarivanja prava na banjsko i klimatsko liječenje branilaca i članova njihovih porodica, koji imaju prebivalište na području Zeničko-dobojskog kantona (u daljnjem tekstu: Kanton) kao i povratnika u Republiku Srpsku koji ostvaruju osnovna prava iz branilačko-invalidske zaštite u općinama Kantona ili koji su na evidenciji nadležnog organa za vojne evidencije u općinama Kantona.
- (2) Medicinska rehabilitacija iz stava (1) ovog člana sprovodi se u specijalizovanim zdravstvenim ustanovama za banjsko-klimatsko liječenje (u daljnjem tekstu: lječilište) sa kojima Ministarstvo za boračka pitanja Zeničko-dobojskog kantona (u daljnjem tekstu: Ministarstvo) ima zaključene ugovore o banjsko-klimatskom liječenju i rehabilitaciji.

Član 2.

(Korisnici prava)

- (1) Korisnici prava po ovoj Uredbi su ratni vojni invalidi sa stepenom invalidnosti 70% i više.
- (2) Pravo na medicinsku rehabilitaciju po ovoj Uredbi, pod uvjetom da im je prema medicinskim indikacijama takvo liječenje potrebno i da su u posljednjih godinu dana liječeni od bolesti zbog koje se upućuju u lječilište (medikamentozno, operativno, fizikalno-ambulantno ili stacionarno), mogu koristiti i:
 - a) dobitnici ratnih priznanja ili odlikovanja;
 - b) ostali ratni vojni invalidi;
 - c) demobilizirani branioci koji su u periodu od 06.04.1992. do 23.12.1995.godine u sastavu Oružanih snaga proveli najmanje 24 mjeseca odnosno 12 mjeseci, ukoliko su u OS pristupili kao maloljetno lice ili neposredno po punoljetstvu;
 - d) članovi porodice šehida, poginulih, umrlih i nestalih branilaca i umrlih ratnih vojnih invalida;
 - e) članovi uže porodice poginulih, umrlih ili nestalih dobitnika ratnog priznanja ili odlikovanja.
- (3) Medicinska indikacija iz stava (2) ovog člana postoji u slučajevima dijagnosticiranja bolesti navedene kao indikacije na Listi indikacija i kontraindikacija za liječenje u prirodnim lječilištima.
- (4) Sa braniocima, u smislu ove Uredbe, izjednačeni su u pravima učesnici narodnooslobodilačkog-antifašističkog rata 1941.-1945.godine, čiji je status utvrđen rješenjem nadležnog organa.

Član 3.
(Posebni korisnici prava)

Pod uvjetima iz člana 2. stav (2) ove Uredbe, posebni korisnici prava na medicinsku rehabilitaciju mogu biti i:

- a) udovica umrlog demobiliziranog branioca koji je u redovima Oružanih snaga proveo najmanje dvije godine, i koja je sa istim živjela u braku najmanje dvije posljednje godine dana prije smrti, pod uvjetom da nema druge prihode i da nije stupila u brak ili vanbračnu zajednicu;
- b) roditelji umrlog ratnog vojnog invalida ili demobiliziranog branioca koji je u redovima Oružanih snaga proveo najmanje dvije godine, ukoliko ih je isti izdržavao posljednjih godinu dana prije smrti.

Član 4.
(Uvjet u vezi prebivališta)

Pravo na medicinsku rehabilitaciju po ovoj Uredbi lica iz člana 2. i 3. ove Uredbe mogu koristiti pod uvjetom da imaju prebivalište na području Kantona u trajanju od najmanje dvije godine neprekidno, osim povratnika u Republiku Srpsku.

Član 5.
(Posebni slučajevi korištenja prava)

U lječilište, u skladu sa ovom Uredbom, izuzetno mogu biti upućeni i članovi invalidskog sportskog kluba i reprezentacije u invalidskom sportu, kao i pojedinci ratni vojni invalidi - sportiste, u okviru priprema za takmičenja.

Član 6.
(Pratilac)

- (1) Korisniku prava se, u slučaju potrebe, može odobriti pratilac u vrijeme odlaska u lječilište i povratka iz lječilišta.
- (2) Korisnik dodatka za njegu i pomoć drugog lica, kao i drugi korisnik prava čija je ukupna nesposobnost jednaka nesposobnosti korisnika dodatka za njegu i pomoć drugog lica, za period boravka u lječilištu ima pravo na pratioca, kojem se osigurava smještaj i ishrana.

Član 7.
(Pojmovi)

Pojmovi iz ove Uredbe: dobitnik ratnog priznanja ili odlikovanja, ratni vojni invalid, demobilizirani branilac, član porodice šehida, poginulog, umrlog, nestalog branioca i umrlog ratnog vojnog invalida i član uže porodice poginulog, umrlog ili nestalog dobitnika ratnog priznanja ili odlikovanja, upotrijebljeni su u skladu sa odredbama Zakona o pravima branilaca i članova njihovih porodica ("Službene novine Federacije Bosne i Hercegovine" broj 33/04, 56/05, 70/07 i 9/10) i Zakona o posebnim pravima dobitnika ratnih priznanja i odlikovanja i članova njihovih porodica ("Službene novine Federacije BiH" broj 70/05, 61/06 i 9/10).

Član 8.
(Dokazivanje statusa)

U postupku ostvarivanja prava po ovoj Uredbi, branioci i članovi njihovih porodica svoj status dokazuju rješenjem nadležnog organa o priznavanju prava na ličnu i porodičnu invalidninu za ratnog vojnog invalida odnosno člana porodice šehida, poginulog, umrlog, nestalog branioca ili umrlog ratnog vojnog invalida; o priznavanju prava na mjesečni novčani dodatak za dobitnike ratnih priznanja i odlikovanja i članove uže porodice poginulog, umrlog ili nestalog dobitnika ratnog priznanja ili odlikovanja; uvjerenjem nadležnog organa o periodu učešća u Oružanim snagama za demobiliziranog

branioca, te na osnovu smrtnog lista i uvjerenja o učešću u Oružanim snagama umrlog demobiliziranog branioca, izdatog u skladu sa Zakonom o upravnom postupku ("Službene novine FBiH" broj 2/98 i 48/99).

DIO DRUGI - MEDICINSKA REHABILITACIJA

POGLAVLJE I. TRAJANJE MEDICINSKE REHABILITACIJE

Član 9.

(Periodi)

- (1) Medicinska rehabilitacija u lječilištu traje četrnaest dana.
- (2) Izuzetno, kada je to medicinski opravdano i na pismeni prijedlog ljekara specijaliste u lječilištu, medicinska rehabilitacija se može produžiti do 28 dana.
- (3) Prijedlog za produženje dostavlja se najkasnije pet dana prije isteka odobrenog roka medicinske rehabilitacije.

Član 10.

(RVI-sportisti)

Članovima invalidskih sportskih klubova i reprezentacija boravak u lječilištu odobrava se za period od sedam do deset dana, jednom godišnje, pred početak takmičarske sezone i evropskog /svjetskog prvenstva.

POGLAVLJE II. POSTUPAK UPUĆIVANJA U LJEČILIŠTE

Član 11.

(Prijedlog ljekara)

- (1) Na zahtjev korisnika prava, ljekar specijalista odnosno zdravstvena ustanova u kojoj isti ostvaruje primarnu zdravstvenu zaštitu, izdaje prijedlog za upućivanje na medicinsku rehabilitaciju (u daljnjem tekstu: prijedlog ljekara).
- (2) Prijedlog ljekara se izdaje nakon izvršenog neposrednog uvida u zdravstveni karton korisnika prava, radi upoznavanja sa podacima o ranijem liječenju, a isti mora biti obrazložen i sadržavati podatke o medikamentoznom, operativnom, fizikalno-ambulantnom ili stacionarnom liječenju, najmanje u prethodnih godinu dana.
- (3) Pored medicinske dokumentacije iz koje se može utvrditi dijagnoza bolesti i način liječenja korisnika prava (otpusnice iz ustanova gdje je stacionarno obavljeno liječenje, nalazi ljekara specijalista - hirurga, ortopeda, traumatologa, neurohirurga, neuropsihijatra i sl.), obavezna je kontrola i pregled kod nadležnih specijalista fizijatra i interniste, čiji nalazi ne smiju biti stariji od 30 dana.
- (4) Nalaz specijaliste fizijatra mora ukazivati na neophodnost medicinske rehabilitacije, a u nalazu interniste mora biti naznačeno da li za boravak u lječilištu ima kontraindikacija.
- (5) U okviru medicinske dokumentacije nisu neophodni laboratorijski nalazi, EKG i radiološke snimke.

Član 12.

(Podnošenje zahtjeva)

- (1) Pravo na medicinsku rehabilitaciju po ovoj Uredbi može se ostvariti podnošenjem zahtjeva općinskoj službi nadležnoj za poslove branilačko-invalidske zaštite u općini u kojoj podnosilac zahtjeva ima prebivalište, odnosno u kojoj ostvaruje prava iz branilačko-invalidske zaštite ili u

kojoj se nalazi na evidenciji nadležnog organa za vojne poslove (u daljnjem tekstu: općinska služba).

- (2) Zahtjev iz stava (1) ovog člana podnosi se na posebnom obrascu kojeg propisuje ministar Ministarstva za boračka pitanja Zeničko-dobojskog kantona (u daljnjem tekstu: Ministarstvo) u roku od osam dana od dana stupanja na snagu ove Uredbe.
- (3) Uz zahtjev za medicinsku rehabilitaciju podnosilac prilaže prijedlog ljekara, nalaze ljekara - specijalista fizijatra i interniste i drugu odgovarajuću dokumentaciju.

Član 13.

(Prijedlog općinske službe)

U roku od pet dana po prijemu zahtjeva, općinska služba utvrđuje prijedlog za upućivanje na medicinsku rehabilitaciju (u daljnjem tekstu: prijedlog općinske službe), koji uz kompletnu dokumentaciju korisnika prava (zahtjev, prijedlog ordinirajućeg ljekara za liječenje u lječilištu, lični karton i prateću medicinsku dokumentaciju) dostavlja Ministarstvu, na jedinstvenom obrascu kojeg propisuje ministar Ministarstva u roku od osam dana od dana stupanja na snagu Uredbe.

Član 14.

(Komisija)

- (1) Nakon stručne obrade prijedloga općinskih službi od strane službenika Ministarstva nadležnog za poslove rehabilitacije (u daljnjem tekstu: službenik Ministarstva), isti se sa kompletnom dokumentacijom prosljeđuju Komisiji za odobravanje upućivanja branilaca i članova njihovih porodica u lječilišta (u daljnjem tekstu: Komisija), koju svojim rješenjem imenuje ministar Ministarstva, u roku od pet dana od stupanja na snagu ove Uredbe.
- (2) Komisiju čine tri ljekara specijalista, od kojih su dva fizijatra i jedan specijalista interne medicine, te službenik Ministarstva, koji je ujedno i sekretar Komisije.
- (3) Posebnim rješenjem ministra Ministarstva utvrđuje se naknada za rad članova Komisije, izuzev za sekretara Komisije.
- (4) Sjednice Komisije, u dogovoru sa ostalim članovima, zakazuje službenik Ministarstva.
- (5) Sjednice se održavaju svakih četrnaest dana, najkasnije pet dana prije termina upućivanja na medicinsku rehabilitaciju.
- (6) O radu Komisije vodi se zapisnik.

Član 15.

(Rad Komisije)

- (1) Komisija vrši vještačenje po svakom zahtjevu pojedinačno.
- (2) U slučaju potrebe, Komisija poziva podnosioca zahtjeva na pregled, a u slučaju sumnje na kontraindikativna oboljenja može zatražiti i druga medicinska ispitivanja.
- (3) U nalazu i mišljenju Komisije se navodi broj i datum održavanja sjednice, da li je potreba medicinska rehabilitacija, u kojem lječilištu i terminu, te daje prijedlog za upućivanje na medicinsku rehabilitaciju.
- (4) U nalazu i mišljenju se navodi razlog za slučaj nemogućnosti odobravanja medicinske rehabilitacije, te prijedlog daljnjeg postupka u liječenju: kontrola i fizikalni tretman ambulantno kod nadležnog fizijatra ili stacionarno na Odjeljenju za fizikalnu medicinu i rehabilitaciju Kantonalne bolnice u Zenici; kontrola i pregled kod određenog specijaliste, itd.

Član 16.
(Ponovni zahtjev)

- (1) Podnosioci zahtjeva kojima nije odobrena medicinska rehabilitacija, mogu podnijeti novi zahtjev nakon isteka roka od šest mjeseci, nakon realizovanja prijedloga Komisije o daljnjem liječenju i uz prijedlog nadležnog ljekara specijaliste.
- (2) U slučaju neodobravanja medicinske rehabilitacije zbog kontraindikacija, ponovni zahtjev se može podnijeti poslije otklanjanja, odnosno izlječenja oboljenja koja su kontraindikativna i nakon isteka roka od jedne godine.

Član 17.
(Odluka o upućivanju i izdavanje rješenja)

- (1) Na prijedlog Komisije i u skladu sa kriterijima utvrđenim ovom Uredbom, ministar Ministarstva donosi odluku o upućivanju korisnika prava na medicinsku rehabilitaciju u određena lječilišta.
- (2) Ministarstvo dostavlja odluku i obavijest općinskim službama o stavu po zaprimljenim prijedlozima, uz povrat kompletne dokumentacije.
- (3) Na osnovu zaprimljene odluke iz stava (1) ovog člana, općinska služba donosi rješenje u skladu sa članom 211. Zakona o upravnom postupku.
- (4) Rješenje o odbacivanju ili odbijanju zahtjeva, u skladu sa zaključkom Komisije u tom smislu, općinska služba donosi u skraćenom postupku na osnovu člana 139. stav 1. i 2. Zakona o upravnom postupku.
- (5) O žalbi na rješenje općinske službe rješava Ministarstvo.

Član 18.
(Ponovno upućivanje)

Branioци i članovi njihovih porodica pravo na medicinsku rehabilitaciju mogu ostvariti samo jednom u kalendarskoj godini.

POGLAVLJE III. BROJ I STRUKTURA KORISNIKA

Član 19.
(Broj korisnika)

Broj korisnika prava na medicinsku rehabilitaciju koji se mjesečno upućuju u lječilišta zavisi od visine mjesečnog iznosa opredijeljenih budžetskih sredstava u tu svrhu.

Član 20.
(Prednost)

Prednost pri upućivanju na medicinsku rehabilitaciju, po pravilu, imaju:

- a) ratni vojni invalidi sa stepenom invalidnosti 70% i više;
- b) ratni vojni invalidi i dobitnici ratnih priznanja i odlikovanja;
- c) demobilizirani branioци;
- d) članovi porodice šehida, poginulih, umrlih, nestalih branilaca i članovi uže porodice poginulih, umrlih ili nestalih dobitnika ratnog priznanja ili odlikovanja;
- e) udovica umrlog demobiliziranog branioca i roditelji umrlog ratnog vojnog invalida ili demobiliziranog branioca iz člana 3. ove Uredbe.

POGLAVLJE IV. - ODLAZAK U LJEČILIŠTE

Član 21.

(Upućivanje na medicinsku rehabilitaciju)

- (1) Ministarstvo dostavlja liječilištu odluku o upućivanju lica na medicinsku rehabilitaciju i dogovara početak liječenja, o čemu obavještava općinske službe.
- (2) Općinske službe blagovremeno izdaju uputnicu korisnicima prava kojima je odobrena medicinska rehabilitacija, sa naznakom lječilišta i termina boravka.
- (3) Korisnik prava kojem je odobrena medicinska rehabilitacija istu može koristiti samo na osnovu izdate uputnice i u terminu utvrđenom uputnicom.

Član 22.

(Spriječenost za odlazak)

- (1) U slučaju opravdane spriječenosti korisnika prava za početak korištenja medicinske rehabilitacije u određenom terminu (smrtni slučaj u porodici, bolest i sl.), isti je dužan je o tome odmah obavijestiti općinsku službu.
- (2) U slučaju iz stava (1) ovog člana početak korištenja medicinske rehabilitacije odgađa se najkasnije za period od 30 dana, u suprotnom je obavezno provođenje ponovne procedure u skladu sa ovom Uredbom.

Član 23.

(Postupak pri dolasku)

- (1) Korisnici prava prilikom dolaska u lječilište, dužni su predložiti ličnu kartu i uputnicu općinske službe, nakon čega se podvrgavaju ljekarskom pregledu.
- (2) Ukoliko prilikom ljekarskog pregleda bude utvrđeno da korisnik prava boluje od bolesti zbog koje je medicinska rehabilitacija u tom lječilištu kontraindicirana, ista neće biti započeta, o čemu korisniku prava lječilište izdaje potvrdu.
- (3) U slučaju iz stava (2) ovog člana lječilište će predmet sa ljekarskim nalazom i mišljenjem vratiti Ministarstvu radi ponovnog razmatranja zdravstvenog stanja korisnika prava od strane nadležne ljekarske komisije.

Član 24.

(Boravak u lječilištu)

- (1) Lječilište je obavezno upoznati korisnika prava sa svim vidovima zdravstvene zaštite, sportske rekreacije kao metoda liječenja i ostalim uslugama predviđenim ugovorom koje je sa lječilištem zaključilo Ministarstvo.
- (2) Korisnik prava na medicinsku rehabilitaciju dužan je pridržavati se pravila lječilišta u pogledu reda i discipline kao i savjeta i uputstava ljekara lječilišta.
- (3) Po završetku rehabilitacije obavlja se ljekarski pregled korisnika prava, nakon čega se podaci o primijenjenom tretmanu, terminu, rezultatima i uspjehu liječenja unose u određene rubrike bolesničkog lista.
- (4) Uz račun za obavljene usluge lječilište dostavlja Ministarstvu kopije izdatih otpusnica korisnika prava koji su okončali medicinsku rehabilitaciju.

DIO TREĆI - ZAVRŠNE ODREDBE

Član 25.

(Sredstva za ostvarivanje prava)

- (1) Sredstva za troškove medicinske rehabilitacije osiguravaju se u Budžetu Kantona, u skladu sa prilivima sredstava, a istim su obučeni smještaj u dvokrevetnim i trokrevetnim sobama, ishrana i zdravstvene usluge.
- (2) Troškove prijevoza u cilju odlaska i povratka iz lječilišta snose korisnici prava.

Član 26.

(Ugovori sa lječilištima)

Ugovorima između Ministarstva i lječilišta regulišu se pitanja broja korisnika prava po smjeni (grupi), dužine trajanja smjena, cijene jednog BO dana, načina i uvjeta plaćanja i druga pitanja od značaja za sprovođenje ove Uredbe.

Član 27.

(Vođenje evidencije)

Elektronsku evidenciju o podnesenim zahtjevima i korisnicima prava po ovoj Uredbi vode općinske službe i Ministarstvo, po obrascima koje propisuje ministar Ministarstva, u roku od osam dana od dana stupanja Uredbe na snagu.

Član 28.

(Ravnopravnost spolova)

Sve imenice koje se odnose na braniocce i članove njihovih porodica, upotrijebljene u ovoj Uredbi samo u muškom ili samo u ženskom rodu, odnose se na oba spola.

Član 29.

(Stavljanje Uredbe van snage)

Danom stupanja na snagu ove Uredbe prestaje važiti Uredba o medicinskoj rehabilitaciji branilaca i članova njihovih porodica u banjско-klimatskim lječilištima ("Službene novine Zeničko-dobojskog kantona" broj 12/06, 6/10 i 2/13).

Član 30.

(Stupanje na snagu i objavljivanje Uredbe)

Uredba stupa na snagu danom donošenja, a ista će biti objavljena u "Službenim novinama Zeničko-dobojskog kantona".

Broj: 02-_____/14.

Datum, 10.07.2014. godine

Zenica

PREMIJER

Munib Husejnagić, dipl.ing.maš.

DOSTAVLJENO:

1x Ministarstvo za boračka pitanja,

1x Ministarstvo finansija,

1x Službene novine Zeničko-dobojskog kantona,

1x a/a.